

SACRIFICE 316

Usa ka Buhing Halad

“Busa nagahangyo ako kaninyo, mga igsoon, tungod sa kalooy sa Dios, nga ihalad ninyo ang inyong mga lawas ingon nga buhi ug balaan nga halad, nga kahimut-an sa Dios, nga mao ang inyong espirituhanong pag-alagad sa pagsimba. Ug ayaw kamo pagpahiuyon niining kalibutana, kondili magbag-o kamo pinaagi sa pagbag-o sa inyong hunahuna, aron inyong mapamatud-an unsa ang kabubut-on sa Dios—ang maayo, kahimut-an, ug hingpit.”
Roma 12:1-2

Ang imong halad. Kasagaran sayop ang pagsabot niining awthag nga ihalad ang imong lawas ingon nga *“buhing ug balaan nga halad.”* Apan, importante kaayo nga ipakita kanimo ang hustong paagi nga mahimong kang labaw pa kay sa usa ka magtutuo ni Jesucristo. Ang bersikulo uno nagahagit sa matag magtutuo nga maghatag ug tukmang halad ngadto sa Dios human sa kaluwasan. Ang bersikulo dos nagahatag ug mga panudlo alang sa kinabuhi human niana nga halad. Magsumiter sa Dios matag adlaw isip kabahin sa pagpas-an sa imong krus matag adlaw, Lucas 9:23. Apan, dili kana mao ang tuyo sa Roma 12:1. Ang sugo nga *“ihalad ninyo ang inyong mga lawas”* mao ang paghimo ug usa ka *kausa amang ug alang sa tanang panahon* nga paghalad, pagtugyan, ug hingpit nga pagsumiter sa Dios. Dili kini kaluwasan. Ang kaluwasan nakabase lamang sa halad ni Cristo. Lahi kini. Imo kini nga halad. Dili kini adlaw-adlaw nga halad. Mao kini ang paghatag sa imong kinabuhi nga walay kondisyon ug sa kanunay ngadto sa Dios ingon nga buhi, balaan, ug kahimut-an nga halad. Mao kini ang imong boluntaryong gasa sa imong kaugalingon sa Dios alang sa Iyang himaya ug alang sa Iyang walay kinutubang paggamit.

Ngano buhaton man kini nga halad? Tungod kini sa Iyang mga kalooy. Ang Roma kapitulo 1–11 naghulagway sa kalooy sa Dios. Ang Roma 12:1 nag-ingon kanimo unsa ang gusto sa Dios nga imong buhaton tungod sa maong kalooy. Ang Roma 12:2 naghatag ug duha ka mga pag-awthag alang sa kinabuhi human sa imong halad. Ang dakong kalooy sa Dios sa pagluwas ug pagbalaan kanimo gihisgotan sa unang napulo ug usa ka mga kapitulo. Busa, ihalad ang imong kaugalingon sa Dios. Panalanginan ka Niya niining kinabuhia ug sa kahangturan. Apan, ang hustong motibasyon sa imong paghalad wala sa imong atubangan. Anaa kini sa imong likod. Ang husto nimong motibasyon nakabase sa unsa ang nahimo na sa Dios. Hunahunaa si Jesus nga nagbayaw sa Iyang mga kamot nga adunay pilason sa lansang samtang nagaingon Siya, *“Human sa tanan nga Akong gibuhay alang kanimo, buhata kini alang Kanako.”* Mao kini ang kahulugan sa Roma 12:1.

Nganong usa man lamang ka paghalad? Tungod kay mao kini ang kahulugan sa mga pulong sa Roma 12:1–2. Ang mga berbo nga *“ayaw pagpahiuyon”* ug *“magbag-o kamo”* sa 12:2 anaa sa present tense o karon nga hitabo. Nagpasabot kini nga buhaton kining duha karon ug padayon nga buhaton sa tibuok nimong kinabuhi. Apan, ang berbo sa *“ihalad ninyo ang inyong mga lawas”* sa 12:1 kay wala sa simpleng present tense o karon nga hitabo sa Griego. Sa Griego, nagpasabot kini ug usa ka higayon nga buhat. Wala kini nagpasabot nga padayonon. Nagpasabot kini nga buhaton kini kausa ug alang sa tanang panahon. Kini usa ka desididong pagtugyan sa imong kaugalingon sa Dios. Ihalad ang imong kaugalingon ingon nga halad ngadto Kaniya. Mahitungod sa imong halad ang Roma 12:1. Mahitungod kini sa pagbutang sa imong kaugalingon sa altar sa Dios sa permanente nga paagi.

Duha ka mga paghulagway. Ang Deuteronomio 15:12–17 naghatag ug usa ka paghulagway niini. Ang usa ka gawasong Hebreohanong ulipon mahimong mopili nga *boluntaryo* ug *permanente* nga magpaulipon pag-usab sa iyang agalon. Kini nga pagpili nanukad sa nangaging kalooy sa agalon. Gitulod kini sa gugma sa ulipon alang sa iyang agalon. Kini permanente. Gigamit ang usa ka lansang (awl) sa pagbuslot sa dunggan sa ulipon aron ipakita nga siya ulipon sa iyang agalon sa tibuok niyang kinabuhi. Kini nga magpaulipon iyang kaugalingong pagpili. Wala kini gipugos kaniya. Usa ka permanente kini nga desisyon. Usa pa ka paghulagway makita sa mga halad sa mananap sa Daang Tugon. Ang usa ka mananap kinahanglan mahimong angay nga ihalad sa altar. Ang mananap nga masakiton o adunay depekto dili dawaton, Levitico 1–5. Naglarawan kini sa balaan ug kahimut-an nga bahin sa imong halad sumala sa Roma 12:1. Ang kamatayon sa gihalad nga mananap nagpakita sa pagkapermanente sa halad. Walay gihalad nga mananap nga mokamang gawas sa altar kong mainitan na kini. Walay pari nga mokuha pag-usab sa mananap sa human sa adlaw aron ihalad na usab sa sunod adlaw. Usa ka permanente kini nga halad. Kon kuhaon nimo ang imong halad sumala sa Roma 12:1 gikan sa altar kon mainit na, dili gayod kini mahimong tinuod nga halad sa Roma 12:1.

Pag-usab sa imong paghalad. Kinahanglan ba nimo usbon ang imong halad sumala sa Roma 12:1? Oo, kon ang imong halad dili kahimut-an. Ang halad sumala sa Roma 12:1 kinahanglan buhi, balaan, ug kahimut-an. Buhi ka tungod kay sa dihang mituo ka kang Cristo, *"milabang ka gikan sa kamatayon ngadto sa kinabuhi,"* Juan 5:24. Ang imong responsibilidad mao nga mahimong balaan ang imong halad. Sa Daang Tugon, ang mga mananap kinahanglan takus nga ihalad. Walay mananap nga hingpit. Apan kinahanglan kini walay sakit, himsog, ug walay depekto. Naglarawan kini ug duha ka butang sa halad sumala sa Roma 12:1. Una, ang imong halad kinahanglan walay sakit. Ang "sakit" sa sala ug pagkabulag sa Dios kinahanglan maayo pinaagi sa kaluwasan. Mao kini nga ang Roma 12:1 gisulat lamang alang sa mga Magtutuo (gipakita sa pulong nga "mga igsoon" sa maong bersikulo). Ang halad sa dili magtutuo dili kahimut-an tungod kay kinahanglan kini ihalad *human* sa kaluwasan, dili sa *wala pa* ang kaluwasan. Kinahanglan moduol ka una kang Jesus sa dili ka pa mosunod Kaniya. Aron masiguro ka ang imong kaluwasan, bisitaha ang www.Gospel316.org. Ang "balaan" nga bahin nagpasabot sa kahimut-an nga lebel sa espirituhanong kaputli sa kinabuhi sa usa ka Magtutuo. Sa diha nga lebel ang imong halad sumala sa Roma 12:1 mahimong kahimut-an sa Dios. *"Busa, kon adunay maghinlo sa iyang kaugalingon gikan niini nga mga butang, siya mahimong sudlanan alang sa dungog, gibalaan, mapuslanon sa Agalon, andam alang sa matag maayong buhat,"* 2 Timoteo 2:21. Dili ka mahimong hingpit. Apan, mahimo nimo ihalad ang imong kaugalingon nga adunay igo nga lebel sa espirituhanong kahimsog ug pagkabalaan. Human madawat sa Dios ang imong buhi ug balaan nga halad, dili na nimo kinahanglan ihalad kini pag-usab. Apan, kon ang imong halad wala madawat sa Dios tungod kay kini temporaryo o dili balaan, nan kinahanglan kini usbon. Ihalad ang imong kaugalingon ingon nga permanente, buhi, ug balaan nga halad. Boluntaryo ug permanente nga magpaulipon ka ngadto sa Dios. Ayaw kini buhata nga walay paghunahuna. Kini usa ka seryoso kaayo nga desisyon human sa kaluwasan. Human madawat ang imong halad, padayon ngadto sa imong kinabuhi sa Roma 12:2—nga dili magpahuyon ug magbag-o—ingon usa ka tinuod nga sumusunod ni Jesucristo. Human sa tanan Niyang nabuhat alang kanimo, buhata kini alang Kaniya!

Kinabuhi human sa imong halad. *"Ug ayaw kamo pagpahuyon niining kalibutana, kondili magbag-o kamo pinaagi sa pagbag-o sa inyong hunahuna, aron inyong mapamatud-an unsa ang kabubut-on sa Dios—ang maayo, kahimut-an, ug hingpit,"* Roma 12:2. Kini nga bersikulo naghatag ug mga pag-awhag alang sa kinabuhi human sa imong halad sumala sa Roma 12:1. Ang mga pag-awhag anaa sa present tense o karon nga hitabo nga nagpasabot padayon nga dili magpahuyon ug padayon nga magbag-o pinaagi sa kanunay nga pagbag-o sa imong hunahuna. Ayaw pagpahuyon, ayaw pag-uyon, sa mga makasasala nga buhat sa kalibutan. Ayaw tugoti nga hulmahan sa kalibutan kon kinsa ka isip magtutuo. Ang Roma 12:2 nag-awhag kanimo nga *"magbag-o pinaagi sa pagbag-o sa imong hunahuna."* Ang Griegong pulong nga gihubad nga *magbag-o* mao lamang gihapon ang pulong nga gigamit kang Jesus sa Mateo 17:2 ug Marcos 9:2 diin giingon nga Siya *nabag-o ang dagway*. Ang Roma 12:2 usa ka pag-awhag nga pagbag-o sa dagway pinaagi sa pagbag-o (renobasyon, hingpit nga kausaban paingon sa mas maayo) sa imong hunahuna. Kining metamorphosis (mas kahibulonga pa kaysa higid nga mahimong alibangbang) mahitabo samtang imong tun-an ug kinabuhion ang Pulong sa Dios. Buhata ang imong halad sumala sa Roma 12:1. Ayaw ipasulod ang imong kaugalingon sa hulmahan sa kalibutan. Usba ang imong panagway samtang imong gitun-an ug gikinabuhi ang Pulong sa Dios. Unya, masabtan ug mapuy-an nimo ang kabubut-on sa Dios.

"Aron inyong mapamatud-an unsa ang kabubut-on sa Dios, nga mao ang maayo, kahimut-an, ug hingpit." Roma 12:2

Usa ka Buhing Halad © 2026 ni John D. Morris III gipatik sa Acts One Eight. Mahimo nimo kini nga i-print, kopyahon, i-post, i-email, o ipadala basta walay usbon unod niining materyal apil na kining tibuok pahayag. Mahimo nimong idugang ang ngalan o logo sa inyong ministeryo o simbahan sa taas sa unang panid ug idugang ang inyong contact information ibabaw sa linya duol sa ubos sa ikaduhang panid. Ang *Sacrifice316* gibase lamang sa Bibliya. Anaa kini aron tabangan ang mga tawo nga motubo sa espirito ug dili lamang magpabilin nga usa ka ordinaryong Magtutuo ni Jesus. Mahimo ninyo i-email ang Acts One Eight (mas maayo kon English) sa: Hello@Mail316.org. Ang mga serbisyo sa paghubad gihimo sa www.ChristianLingua.com. Ang *Usa ka Buhing Halad* anaa sa 48 ka pinulongan nga libre sa www.Sacrifice316.org. Ang mga kutlo sa English nga bersyon gikan sa New American Standard Bible 1995 sa The Lockman Foundation. Ang mga kutlo sa Bibliya niini nga hubad gikan sa: Ang Bag-ong maayong balita.